

AKHINNAJA.

- 1 Anu cha Pfukhan ay Aligkujon an hempfalay cha.
- 2 Ja gwa han oh-ohha an empfalay cha an hay ngachana ja hi Akhinnaja.
- 3 Gwa hanohan arkhaw ja inalin Aligkujon ay ahagwa na an hi Pfukhan hi,
<<Tumungaw a ta umuja' muntamu.>>
- 4 Ja timmungaw hi Pfukhan ay Akhinnaja.
- 5 Ja gwa an maha'-ad, ja inali na hi <<Muntabtabla' a, inna Akhinnaja, ay tay khujuchan ta uja' munhaka'-ang ti umali hi amam ja ma-id anun ta-o.>>
- 6 Ja teneynana chin unga an gwa an khun muntabtabla' ay chuy khujuchan hichi cholah.
- 7 Ja unagku na'na'-amtang ja nalo hi Pfu'pfu'-at ja tinnig na hi Akhinnaja an khun mun-amoh.
- 8 Ja inali na hi, <<Totototooot. Umali a ta mun-abpfa ta, inna Akhinnaja.>>
- 9 Ja inalin Akhinnaja hi, <<Angnga' ni', ti nan atattata-ot hinuy chutchut mu nan nachutchutan hini khatud mu.>>
- 10 Inalin Pfu'pfu'-at hi, <<Totototooot. Podhomakkay ni' muti ma'ma'-atong hitay khatud u ta mi'jali a ay ha-in hichi pfalay u ta tikhagwom hini mapmaphod an pfalay u.>>
- 11 Ja allon Akhinnaja hi, <<Angnga' ni' ti atattata-ot hinuy khatud mu an nachutchutan.>>
- 12 Ja inalin Pfu'pfu'-at hi, <<Totototooot. Epachamakkay ni' an mi-abpfa an ma'ma'-atong hitay chutchut u.>>
- 13 Ja inalin Akhinnaja hi, <<Aa, kayku.>>
- 14 Ni-abpfa hi Akhinnaja ay Pfu'pfu'-at ja entagtag Pfu'pfu'-at hi Akhinnaja ja incha-utcha-utut na hichi ot-otor chi acha.
- 15 Unagku khimmahad hi Pfukhan ja inali na, <<Chadmah chin unga? Nga khu nuy nanglajaw?>>
- 16 Ja unot naha'-ad ja immali hi ahagwa na an mangan, ja inali na hi, <<Ot chah hi Akhinnaja?>>
- 17 Ja allona hi, <<Innu, una-agku henongkhop an munhaka'-ang ja unagku khimmahad ja ma-id.>>
- 18 Ja allona hi, <<Haw he-a pay hiton hi Pfukhan ngay i mu enat chin unga?>> Chun hijaot un a tumungaw ta un mu titigkhan?>>
- 19 Ja allona hi, <<Hija numpay, an tan agkhuy u tinnig. Ja allo' agku ta an khun mun-amammoh ja una-agku khimmahad ja ma-id.>>
- 20 Ja inkimoh Pfukhan an kumila.
- 21 Ja inalin Aligkujon chin nun-ingwi'gwit hi, <<At ngay chamchamma aton? Unchah la-ahna ja inkimoh an tumungaw an munnomnom ay chuy unga an na-utaw? I taot ta i ta muntamu.>>
- 22 Ja amat hichi, ja empacheh cha an i muntamu chin pajaw chah chi ad Na-oli'lipan.
- 23 Ne-atam cha Pfu'pfu'-at ay Akhinnaja hichi pfalay na hichi ot-otor chi acha.
- 24 Ja inalin Pfu'pfu'-at ay Akhinnaja hi, <<Tayya han pfalay u. Hitay chi pihihittugwan ta. Ja an amin hini mahapor mu ja allom ay ha-in ja an amin hini podhom an ihcha ja allom ay ha-in hot ipapfutay u.'-
- 25 Ja gwa khu an naha'-ad ja allon Pfu'pfu'-at ay Akhinnaja hi, <<Totototooot, chad a mah Akhinnaja? Ngay podhom hi ihcha? Hay iklug weno hay manu' weno hay pfapfuy?>>
- 26 Inalin Akhinnaja hi, <<Hay iklug chi podho' hi ihcha.>>

- 27 Ja inali na hi, <<Totototooot umuy a ay chuy partug ta munhapan-iig a ay chuy gwachaan hachi tani'-i an holo'; hot gwacha han iklug ja enalam. Ja in-alim ta ehaka'-ang u ta ihcham.>>
- 28 Pfimmutay hi Akhinnaja an nuntatakgka-i ja nunhapan-iig na chin gwachaan chi holo'.
- 29 Chinakngana chin cho-or an iklug ja pinnu na chin tagkha-i.
- 30 Ja inhikhop na ja enhaka'-ang Pfu'pfu'-at ja penangana Akhinnaja.
- 31 Ja nabhug ti cho-or chin inihcha na an iklug.
- 32 Ja tinnig Pfu'pfu'-at an ma-id at-aton Akhinnaja ja inali na hi <<Hot khegkhenong a ta uja' mun-ephod hi ayyud ta gway pon-ay-ayyucham.>>
- 33 Enalan Pfu'pfu'-at chin ugway ja i na enkho-od ja enephod na hi ayyud.
- 34 Ja inali na ay Akhinnaja hi, <<Totototooot. Umali a Akhinnaja ta mun-ayyud a ti tan enephod u han ayyud mu.>>
- 35 Immuy hi Akhinnaja ja nun-ayyud.
- 36 Empawah na an mun-ayyud ja unagku empawah na an mun-ayyud ja tinnig na an gwacha cha ama na ay ina na an khun cha munhu'hu'loy chin pajaw cha hichi ad Na-oli'lipan.
- 37 Engwahay Akhinnaja an mun-uwai' ja inali na hi, <<Chidchuuujaaa, chidchuuujaaa, cha ama ay ina ad Na-oli'lipan.>>
- 38 Ja chengngor Pfu'pfu'-at an khun mun-uwai' hi Akhinnaja ja inali na hi, <<Totototoot. Achi a homerher Akhinnaja ti chonglon cha amam ay inam ja immali cha ja enala chi-a.>>
- 39 Ja khemmegkhenong hi Akhinnaja, ja inkimoh na an mun-ay-ayyud.
- 40 Na-amtang khu ja impiggwa na an mun-uwai'.
- 41 Ja enamang na khuh cha ama na ay ina na ja allon na hi, <<Chidchuuujaaa, chidchuuujaaa, cha ama ay ina an khun cha munhu'hu'loy chin pajaw mi ad Na-oli'lipan.>>
- 42 Chengngor Pfukhan chin khun mun-uwai', ja inali na hi, <<Ngachan mu mah hiton umuwa-uwai' hina ot-otor chi acha?>>
- 43 Ja inalin Akhinnaja hi, <<Ti ha-in chin empfalay ju an hi Akhinnaja an enlajaw Pfu'pfu'-at ja toja' atag heto ot-otor chi acha.>>
- 44 Ja inalin Aligkhujon ay ni ahagwa na an hi Pfukhan hi, <<Ngachah agku nuy tatangngachom hichi acha, ta muntamu ta ti un hay hana ayya ja un hokhokin chi khajang.>>
- 45 Ja chengngor Akhinnaja an inalin ama na an khajang hija.
- 46 Empawah na khu an mun-ayyud ja inali na hi, <<Pfu-uuna' pfu-uuna'-atag hokhokin chi khajang an ha-in chin empfalay ju an hi Akhinnaja.>>
- 47 Ja tenangad khu Aligkhujon ja inali na hi, <<Aa ken kayku an niya an chin hapit Akhinnaja hinuy.>>
- 48 Amat hichi, ja empacheh cha an immanamot hichi pfalay cha ti nadhom.
- 49 Ja un khu chin nun-ingwi'gwiit ja inalin Aligkhujon ay ahagwa na hi, <<I ta ta i ta khu muntamu ta alom ja ipigpiggwan nuy khun mun-uwai'. Ja i ta tatagwaa hiningit ta alam ja un hi Akhinnaja.>>
- 50 Ja empacheh cha khuh chin nun-ingwigwiit ja gwacha khu an nunkhagwa ja khun cha munhu'hu'loy chin pajaw cha.
- 51 Ja immuy khu Akhinnaja an mun-ay-ayyud chin ayyud na ja enamang na khu an gwacha cha ama na an gwa an khun cha muntamu.
- 52 Ja impiggwa na khu an mun-uwai'.
- 53 Ja inali na hi, <<Haw inay, cha'ju ama ay ina an achiya' ihi-ar.>>
- 54 Ja tenangad khuh cha ama na, ja inali na hi, <<Ihi-ar mi he-a muti ngay aton mi atag an umali ay ni gwachaam an tayya an ma-id aton mi ti tan acha ja mi-id mapto' hi agwun mi?>>

- 55 Ja amat hichi ja immuy hi Pfu'pfu'-at ja inali na hi, <<Achi a numpay tomleng Akhinnaja ti umali cha amam ja inaw-agwit chi-a.>>
- 56 Ja amat hichi, ja nakak khuh Pfu'pfu'-at ja inalin Akhinnaja hi, <<Pajuum unakkay atag mephod hay kurha ta gway agwun cha ama ay ina an umali.>>
- 57 Unagku la-ahna ja nagwangan chin potaar ja chin acha ja nephod chin chalan.
- 58 Ja inalin Pfukhan ay Alighujon hi, <<Ti chiya mah an nagwangan hichi chalan hotti i ta adchiya ta i ta hingiton hini khun mun-umun-uwai'.>>
- 59 Ja amat hichi ja nunti-id cha an hempfay.
- 60 Khun cha muntimunti-id ja ne-atam cha hichi ot-otor chi acha ja chinakngan cha hi Akhinnaja an khun mun-ay-ayyud.
- 61 Ja inalin Alighujon hi, <<En achaw atag an toy aja hiton empfay mi an ngachah chi nang-ali atag ay he-a heto?>>
- 62 Ja inalin Akhinnaja hi, <<Innu, un nalooh atag hi Pfu'pfu'-at ja in-abpfaa' ja in-alija' heto.>>
- 63 Ja allonaot hi, <<Chadmah hini Pfu'pfu'-at an nang-ali ay he-a heto?>>
- 64 Ja allon Akhinnaja hi, <<Umuy ta-oakkay ni' ta i ta-o tikhan.>>
- 65 Immuy cha ja chinakngan cha hi Pfu'pfu'-at an gwa an khun mun-an-annichu.
- 66 Ja inali cha hi, <<Unchah he-a Pfu'pfu'-at hini nang-ali ay tay empfay mi heto?>>
- 67 Ja allon Pfu'pfu'-at hi, <<Aa, muti achiya' adni' atag patajon ti un u enala hitay empfay ju ti anad tugwali ta i ju tattaynan hina cholah? Ti mi-id mannig ja in-abpfaa' ken; hotti achiya' patajon ti tayya hitay pfay u ta ponpfay tay empfay ju.>>
- 68 Ja inali cha hi, <<Aa achi chi-a patajon hotti achi a toma-ot.>>
- 69 Ja inali na hi, <<Hotti chiyya atag an naha'-ad ta mangan ta-o heto ja un aju umuy.>>
- 70 Ja allon Alighujon hi, <<Ti aa.>>
- 71 Ja allona hi, <<Ngay podhon ju hi ihcha? Hay iklug, manu', weno hay pfapfuy?>>
- 72 Ja inali cha hi, <<Ti ikhad a.>>
- 73 Ja inalin Pfu'pfu'-at hi, <<Mumparti ta-o hi pfapfuy ta gway ihcha ju.>>
- 74 Pfimmuy hi Pfu'pfu'-at ja munjokajokajoka ja unagku la-ahna ja immali hachi cho-occo-occo-or an apfapfupfapfuy.
- 75 Chimpap cha chin oha an inlum.
- 76 Pinarti cha ja ingkhimoh cha Alighujon ay Pfukhan an mangan ti maphod chin pfapfuy an inihcha cha.
- 77 Ja amat hichi ja inali cha hi, <<Hot agwiton miakkay hitay unga.>>
- 78 Inalin Pfu'pfu'-at hi, <<Achi ju agwiton ta podhon ju ayya ja immali aju heto ta un ta-o mehehetto an amin.>>
- 79 Ja allon cha hi, <<Achi ami ken ti ngay mannig chin pfay mi ja ngay manamuwan chin pajaw mi ad Na-oli'lipan?>>
- 80 Ja amat hichi, ja empacheh cha chin nahilip ja teneynan cha hi Akhinnaja hichi ot-otor chi acha.
- 81 Ja unot umuy chi at hichi hi arkhaw ja gwa an lemmakkay hi Pfu'pfu'-at ja anila na an gwa an matoy.
- 82 Ja inali na hi, <<Totototooot, chad a mah Akhinnaja? Ma-aakkay ni' ta gwacha han er-allo' ay he-a ti tayya an matoja'.>>
- 83 Inali na hi, <<Nu matoja' ayya, inna Akhinnaja, ja achiya' i etapar ay he-a. Ephocha' an ilupfu' ay chuy partug. Hotti inlupfu-a' ayya, hot

umuy chi at hichi hi arkhaw hot gwacha han homangaw an ajiw ay ni lupfu' u. Ja achim li-ajon ja achim charhan hinuy an ajiw ta omotongan. Ja hinuy chi pangpfakhaam an amin hi mahapor mu. Hot pfumutay hini mahapor mu an epfakham ay ni ajiw.>>

84 Ja achi tatagwa umuy chi at hichi hi arkhaw ja natoy hi Pfu'pfu'-at.

85 Ja in-uy na inlupfu' ay chuy partug.

86 Umuy chi ohay pfulan ja gwacha han hemmangaw an ajiw ja emmotongan.

87 Immuy hi Akhinnaja ay chuy ajiw ja ni'hapit ja penhod na an umihcha hi iklug. 88 Ja inali na hi, <<Mahapor u hay iklug hi ihcha'.>> hon pfimmutay chin mahapor Akhinnaja.

89 Mahapor na khu hi mapmaphod hi lopfong.

90 Ja immuy chin ajiw ja inali na hi, <<Mahapor u hay lopfong u hi mapmaphod.>>

91 Ja pfimmutay chin maphod an lopfong na ja ingkhana an empfakha na hichin maphod an otongan an pfalay na ja nephod.

92 Hotti hijah tay chi ang-angonoh na an hudhud Akhinnaja an pfimma'nang hija ti an amin chin mahapor ja empfakha na ay chuy ajiw hon pfimmutay.

93 Angkhaynana hini hudhud Akhinnaja ay Pfu'pfu'-at.